

بِسْمِ اللَّهِ الرَّحْمَنِ الرَّحِيمِ

إِنَّ الدِّينَ عِنْدَ اللَّهِ الْإِسْلَامُ



إِلَهَ إِلَّا اللَّهُ مُحَمَّدٌ رَّسُولُ اللَّهِ

KHUTBA JUMMAH

HADHRAT MUHYI-UD-DIN AL-KHALIFATULLAH

MUNIR AHMAD AZIM

05 Avril 2019

28 Rajab 1440 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor :

JIHAD DANS L'ISLAM

Ene religion li seulement digne de ce nom si li rimé avec bon sens. Si li pas arrive impose li par sa moyen là, et ki li bizin servi l'épée pou couvert so bane manquements, alors li pas bizin aucaine les autres arguments pour prouve so imposture (c'est-à-dire, ki li fausse). L'épée ki li brandir, tranche so propre la gorge avant même ki li atteindre so cible. L'objection ki ena, ki fine servi l'épée pendant bane premiers l'années de l'islam, et kot alors sa argument là fine répanne ki *Jihad* li légal, alors tout sa là li fonder lors bane dimounes zot l'ignorance de saki fine vraiment passer dans le passé, et ki bane conditions ki ti prévaloir à sa l'époque là, pendant sa période là. L'islam pas fine jamais autorize servi l'épée pour ki li vine ene source de ralliement. Jamais li pas fine dire prend l'épée ou kit les autres z'armes et monte la masse de bane croyants contre bane non-croyants et force zot pou accepter l'islam. Non ! D'ailleurs Quran Shareef interdit servi la force en matière de la religion. **Kifaire alors bane musulmans fine bizin servi l'épée (à sa l'époque là) ?**

Bane circonstances ki fine amène zot pou servi sa mesure là pas ena nannié à faire avec la propagation de la religion ; sa bane circonstances là, sa bane actions là zot

lié à la protection de la vie. Nous capave résume sa coumsa : bane habitants de bane déserts de l'Arabie ti bane barbares ki pas ti bien capave distingue le bon de saki pas bon. Zot fine nourri ene la haine dans zot pour l'islam ki ti prend naissance à sa l'époque là et sa bane là fine alors vine bane pli pires l'ennemies de l'islam. Sa la haine ki zot ti ena envers l'islam, nous capave facilement comprend li comme suite : Bane arguments ki bane premiers musulmans fine avancer en faveur de l'unicité d'Allah et bane vérités islamiques fine vine bien dure pou encaisser par bane idolâtres de Makkah et de so bane alentours. Zot pas ti capave guette l'islam et bane musulmans prend ene l'ampleur, et surtout zot arguments en faveur de l'unicité d'Allah ti pé créer désordre dans zot propre croyance d'avant l'islam, c'est-à-dire, l'idolâtrie. Bane arguments de l'islam ti pé piétine zot propres mauvais croyances.

Alors bien vite, avec progrès de l'islam, bane habitants de sa bane régions là fine vite réaliser ki li bien malfaisant, et li pas de rang de l'homme, ki créature le plus noble d'Allah parmi tous So bane les autres créatures ki Li fine créer, pou soumettre li à ene roche. Avec l'islam, sa aveuglement là fine tomber et zot fine réalise la vérité. Bane Mecquois fine vine alors dans ene position ki zot pas ti capave contrer (alle contre) bane arguments de l'islam ki bane nouveaux adhérents de l'islam fine mette devant zot. Zot pas ti pé capave réponde sa bane nouvo convertis de l'islam là. Bane ki ti doué de la raison parmi sa bane Mecquois là fine vite réalise la vérité kan zot fine tende sa bane arguments véridiques là et zot aussi fine vine zoine le rang de l'islam. Et alors, avec sa bane manifestations divines là, entre sa bataille verbales entre la vérité et fausseté, alors bane liens de parenté fine casser et bane garçons ti pé séparer de zot bane parents et ene frère ti pé séparer avec so bane les autres frères. Sa ti pé faire bane Mecquois bouilli de rage, et alors li fine vine clair pou zot, ki seul recours ki zot ena pour contrer la diffusion de sa nouvo religion là ti l'utilisation de bane mesures extrêmes – attention ki sa nouvo religion là alle piétine complètement zot bane fausses croyances ki zot bane parents ti donne zot. Et alors, zot fine commence persécute à l'extrême, ziska même la mort bane nouvo musulmans. Sa bane non-croyants là fine persécute couma dire bane sauvages sa bane pauvres musulmans innocents là, ki ti pé seulement répanne la lumière de la vérité.

L'histoire de bane premiers l'années de l'islam démontrer la barbarie et cruauté ki ti servi contre sa bane convertis musulmans là ki fine subir bane pli pires maltraitance et parmi beaucoup d'entre zot fine être assassiné, sans aucaine pitié.

Mais sa bane mesures là pas ti empêche bane les autres chercheurs de vérités pou vine zoine l'islam. Kan bane l'ennemis acharnés de l'islam fine alle rende zot compte ki bane persécutions ki zot ti pé mette lors bane musulmans pas ti abouti à nannié, alors zot fine prend la décision pou physiquement élimine le Saint Prophète de l'Islam, Hazrat Muhammad (saws) ; c'est-à-dire, zot fine prend la décision pou faire touye li. Mais Allah (twa) fine fer zot plan flop, parski Allah (twa) fine décide autrement et fine sauve le Saint Prophète (saws) kot Li fine fer li émigrer vers Madina. Mais bane incroyants ti népli capave dormi en paix kan zot fine apprane couma l'islam et bane ki zot ti persécuter pé contigner fer progrès aller même. Sa bane infidèles là fine alors suive bane musulmans ziska Madina et alors zot fine penser ki la mort de sa bane musulmans là tousel (sel solution pou zot) ki capave apporte la tranquillité pour zot. Alors, li bien évident ki bane musulmans, ki l'islam dans so l'ensemble pas capave reste les bras croisé. L'islam et bane musulmans ti bizin défanne zot de bane l'attaques meurtriers de sa bane non-croyants là. Ki faute sa bane musulmans fine faire coumsa ki zot bizin subir en silence bane massacres et crimes de sa bane infidèles là ? Kifaire zot bizin reste tranquille ? Kifaire zot pas autoriser pou défendre zot la vie ? Zot ti ena tout droit pou défendre zot la vie et pou protège la religion d'Allah aussi et zot fine faire li, par l'aide immense d'Allah !

Kifaire bane ki ti pé persécute bane musulmans, bane ki pas ena aucaine morales et ki fine mette dans zot l'esprit pou commette bane crimes envers bane musulmans, alors kifaire sa bane là pas bizin paye le prix de zot propre plan criminel là ? N'importe ki sanlà, sans aucaine préjuger, eski li capave sincèrement avancer – par faute de preuves – ki l'islam fine bizin ena recours à l'épée pour augmente le nombre de so bane fidèles ? Bane ki soutenir bane telles objections contre l'islam fine être coupables d'ene l'injustice bien grave d'autant plus ki sa bane dimounes là fine avec propre connaissance, cachiette la réalité de bane faits, ki ti passer à sa l'époque là. Li toutefois vrai ki bane Mullahs musulmans aussi bien ki bane missionnaires Chrétiens zot à blâmer pour sa accusation injuste contre l'islam là. Tous les deux fine laisse croire ki l'islam pratique ene telle *Jihad* par la force de l'épée pour augmente le nombre de so bane suivants.

Bane Mullahs ignorants, d'ene côté, tout en prétendant ki zot pé soutenir l'islam fine sans cesse mette dans l'esprit de la masse, dans l'esprit de bane dimounes simples, à travers zot bane discours et zot bane *fatwas* sa fausse doctrine de *Jihad* là et d'autre part bane objections de bane missionnaires Chrétiens, ki ti

considérer couma bane grands savants (érudits), fine contribuer pou alimente sa fausse notion ki l'islam fine servi la force et l'épée pou fer dimounes accepter li.

Vu ki doctrine de *Jihad* ti soutenu par bane preuves ki vine de sa deux parties opposées là, alors so signification réelle pas fine capave être compris par la masses populaire. Si sa bane missionnaires là, ti déclarer avec toute honnêteté ki bane *fatwas* de sa bane Mullahs là ti fonder lors l'ignorance de l'histoire de l'islam, et ki bane circonstances prévalant à sa l'époque là népli exister de nos jours, alors le concept de *Jihad* (ki zot ena dans zot l'esprit – ki servi la force) ti pou depuis bien lontan effacer de la surface de la terre. Mais sa bane missionnaires là pas fine réalise bane mauvais conséquences d'ene telle prise de position et zot zèle (dévotion) pour zot propre religion (fine aveugler zot), fine jette ene voile lors zot capacité pou comprendre et accepter la vérité. Mo bizin aussi mentionner ki permission pou défendre zot-mêmes et pou touye bane l'ennemis de l'islam pas ti accordé à bane musulmans aussi longtemps ki bane arabes pas ti rende zot coupables de bane crimes punissable par la mort, plus précisément zot bane persécutions criminels lors bane musulmans. Mais ene clémence (le pardon) ti toujours envisageable pour tous bane ki zoine le rang de l'islam et exprime ene regret pour zot bane pêchés d'avant. L'unité de la religion fine créer ene tel fraternité tellement solide ki même tous bane kitchoses ki ti passer avant zot conversion à l'islam, malgré ki kalité douloureux zot ti douloureux, tout sa là ti oublier et pardonner kan zot fine zoine le rang de l'islam. C'est ici ki quelques opposants de l'islam fine faire fausse route et zot fine conclure ki sa nouvo religion de l'islam là fine force bane infidèles pou embrasse l'islam.

La responsabilité pou prive ene lé monde en entier de bane beautés de l'islam repose lors bane Mullahs ki fine enseigne bane doctrines ki hostiles à la nature humaine, ki hostiles à l'islam, le vrai façon de vivre de l'homme.

En réalité, bane faits zot exactement à l'opposé ; pas ti ena aucaine contrainte à sa niveau là; sa ti ene faveur ki fine donner à tous bane ki fine mérite par zot bane actions, zot bane crimes la peine capital (c'est-à-dire, la peine de mort). Li pou absurde pour faire ene rapprochement entre ene punition justifié et ene obligation quelconque. Sa bane dimounes là ti mérite la mort non pas parski zot pas ti amène la foi dans mission du Saint Prophète (saws) mais bien parski zot ti touye ene bon nombre de bane dimounes innocents. La sanction extrême de la loi ti appliquer lors zot. Mais la grâce d'Allah li infinie et Allah fine donne zot encore

ene chance pou repentir. Sa démontrer clairement ki l’islam pas ti ena le seul objectif pou donne la mort à sa bane infidèles criminels là, mais l’islam fine démontrer aussi ki li ouvert au pardon, même si criminel là ti mérite la peine de mort.

L’islam ti bizin faire face à bane les autres problèmes. Bane préjugés religieux ti tellement forts dans sa l’époque là ki si ene membre d’ene tribu ti adopter sa nouvo la foi là (c’est-à-dire, l’islam), alors bane les autres membres de so tribu ti pé menace pou torture li ou pou touye li. Persécution ti vine tellement atroce ki vive ti vine ene fardeau pour sa bane nouvo musulmans là. L’islam ti bizin aussi surmonte sa obstacle là en établissant la liberté de bane croyances et de bane pratiques religieuses, et pour faire sa, li ti bizin défanne li-même en menant bane la guerres.

Bane premiers la guerres dans l’époque de l’islam tombe sous bane principes ki mo fine depuis le commencement mentionner, vini même. L’islam pas fine jamais servi l’épée pour propage li-même ni pour aucaine les autres causes. Bane zefforts incessants fine être mis en œuvre pour efface so l’existence et alors li ti bizin défanne li-même pour assure so survie. Le recours à bane z’armes ti ene obligation et non ene choix parski so bane adversaires aussi ti armé.

Par la suite bane vrais principes de l’islam fine oublié, et doctrine de *Jihad* fine être interprété différemment et l’ignorance fine prend place, et fine faire ki ene la haine fine développer contre sa religion là (c’est-à-dire, l’Islam). Mais le coupable pas capave être l’islam, parski la source de l’islam li pure et sain.

Le fait ki sa doctrine là fine identifier à l’islam par bane idiots ki fine dévoué zot corps et âme pou ki sa fausse notion de l’islam persister exister, bane telles dimounes ki pas ena en aucaine façon kit respect pour la vie humaine, pas capave être remis en question. Sa li ene vérité indéniable ki c’est à travers sa bane dimounes ki spirituellement corrompu ki l’islam azordi jours pé paye les pots cassé. Et le sang de bane innocents ki fine versé depuis l’islam so premier pas et vini même ziska azordi jours pas fine rassasier sa bane qualités Mullahs fanatiques là.

Pour zot, d’après zot propres interprétations de bane commandements divines, et de bane paroles du Saint Prophète (saws), zot pé attane ene Réformateur ki

assoiffé de sang, d'après l'image ki zot fine faire du Mahdi et du Messie de l'islam. Et zot fine encre sa dans zot propres l'esprit et dans l'esprit de la masse de bane musulmans, à travers sa Messie sanguinaire là, ki c'est par bane massacres ki l'islam et l'unicité d'Allah pou rétablie, et alors par sa, sa bane Mullahs imbéciles là zot impatients pou exhibe l'image le plus détestable de l'islam devant l'ensemble de bane nations, afin ki zot tout penser ki l'islam fine toujours ena recours à la force et à la violence pour propage so bane doctrines, et kot alors par le biyé de sa bane Mullahs là, l'islam en d'autres mots pé avouer ki li pas possède même ene ti goûte de vérité dans so support pour conquérir les cœurs de bane dimounes. La honte lors sa bane Mullahs égarer là !

Li paraite ki bane ki soutenir bane telle l'opinions zot pas satisfaits de l'humiliation et décadence ki l'islam fine bizin subir, ki li fine souffert et sa bane dimounes là pé faire encore plisse zéfforts pou dénigrer li plisse encore. Sa bane dimounes là zot ena source de la honte et surtout de reproches pour l'islam. Mais Allah astaire népli oulé ki l'islam li être reconnu couma ene religion barbare et Li (Allah) ouler débarrasse tous bane nuages sombres ki fine accumulés là-haut li. Li aussi malheureux pou constater ki bane opposants de l'islam pas fine faire aucaine zéfforts pour recherche la vérité et ki zot fine laisse zot influencer par la propagande ki l'islam fine servi l'épée pour propage li dès so bane premiers pas ki li fine faire dans sa le monde là.

Li grand temps ki l'islam li débarrassé de sa bane accusations là. Si bane Mullahs ti unir zot-même pour déracine sa mal là, sa ti pou fer ene pli grand bien à tous zot bane coreligionnaires. Le rejet de l'islam, et le dégoût pour l'islam ki fine exprimés par les autres nations zot compréhensibles. Et sa situation là pas pou changer aussi longtemps ki sa concept de *Jihad* là pou persister. Pour tous sa bane malentendus là, bane musulmans zot-même zot à blâmer. La responsabilité pou prive ene lé monde en entier de bane beautés de l'islam repose lors bane Mullahs ki fine enseigne bane doctrines hostiles à la nature humaine. Ki religion capave revendiquer ki li vine de Dieu si so bane l'enseignements bizin l'aide de l'épée pour pénétrer dans les cœurs de bane dimounes ?

Bane telles penser ki fine filtrer à travers le temps fine suffit pour repousse même bane dimounes avec bane bons nature et pensées de la vérité de l'islam. Sa c'est vraiment bane grands tracas et mals ki nécessite la venue d'ene Réformateur,

d'ene Khalifatullah. Kan nous faire ene bilan de l'état interne de l'islam actuel, nous capave constate seulement ene grand déception et ene désordre complet.

Avec mo venue comme l'humble serviteur d'Allah, pour explique zot la foi, pour révèle bane vérités d'Allah et de la nature humaine, le monde islamique et l'humanité toute entière ena tout à gagner en soumettant à la volonté d'Allah et pou consacrer zot la vies en entier dans l'obéissance d'Allah et de So l'Élu de sa l'époque là. *Insha-Allah*.

ISRA ET MI'RAJ

Avant termine mo Khutba, mo ti oulé dire quelques mots lors Isra et Miraj du Saint Prophète Muhammad (saws). Sa ti en effet deux de bane visions et communications plus importants ki le Saint Prophète Muhammad (saws) fine recevoir de la part d'Allah (twa), parski c'est pendant ene de sa bane voyages spirituels là – pas voyages physiques – ki Allah fine ordonne à Hazrat Muhammad (saws) et à so *Oummah* (so communauté) pour faire So l'adoration (*Salat*) cinq fois par jours. Au fait, Allah ti prescrire 50 fois *Salat*, mais finalement li fine vine cinq fois seulement, mais celui ki pas pou rate so cinq fois *Salat* (*Namaz*) et faire li avec dévotion pou gagne récompense 50 fois *Namaz*.

Alors, nous, bane musulmans, nous bizin donne sa bane jours béni là tout so l'importance, non pas parski le Saint Prophète (saws) fine faire bane voyages « physiques » dans les ciels, mais bien parski tout bane communications entre Allah et So Messenger ti spéciale et pou reste toujours spéciale. Sa bane expériences là ti purement spirituelles, ki fine vive par le Saint Prophète Muhammad (saws) dans ene l'état entre l'éveil et le sommeil, kot nous appelle sa « *Kashf* » (vision).

Mette sa bien dans zot l'esprit ki l'homme zamais pas pou capave monte physiquement dans les ciels, même si li arriver mort, ene la mort définitif. Même dans sa cas là, so cadavre physique reste lors la terre, tandis ki so l'âme retourne là kot li pé bizin aller, kot Allah fine destine li pou aller.

Kan bane infidèles ti demande le Saint Prophète (saws) pou monte au ciel et pou apporte ene livre pou zot de là-haut, voici réponse ki Hazrat Muhammad (saws) ti

donne zot : « *Eski mo pas nek ene être humain, ene Messenger ?* » (Bani Isra'il/ Al-Isra 17 : 94).

L'état de « *Kashf* » li pas ene l'état de la mort définitif. L'âme li spirituellement éveillé et li connecté à Allah par le biyé de So révélation et So la Force Divine ki attire li vers Li (Allah) et vers ene lé monde de bien-être spirituel temporaire. Le Saint Prophète Muhammad (saws) fine vive bane « *Kashf* » plus parfaits parski Allah fine faire li traverse sept les ciels pour entretenir avec li d'ene façon intime et rempli d'amour.

Dans bane Hadiths authentiques, ena la mention de deux l'occasions importants kot le Saint Prophète fine voyage dans ene l'état de vision ziska li arrive dans la Présence d'Allah, sans ki toutefois li trouve Li avec so lizié physiques, parski Allah dire dans Quran, ki Li saisi tout lizié, mais ki aucaine lizié pas capave saisi Li (Allah). (Al-Anam 6 : 104).

Ibn Abbas (ra) raconter ki le Saint Prophète (saws) fine trouve Allah deux fois à travers so lé cœur. (Muslim).

Sa bane visions d'Allah ti nek bane manifestations divines, mais zamais li fine trouve Allah dans So forme réelle. Li fine trouve Allah à travers lizié de so lé cœur et non pas par so liziés physiques (Pareil couma sa révélation là dire : **Arayto Rabbi bi ayni Rabbi** – *Mo trouve mo Seigneur à travers l'œil de mo Seigneur*). D'après Abu Dharr, le prophète (saws) ti trouve ene la Lumière bien perçant/brillant.

Ene de sa bane visions là ti arrive kot Ka'aba tandis ki l'autre là ti passer dans la caze de so cousine, Umme Hani, et tous les deux visions ti vécues par le Saint Prophète Muhammad (saws) dans ene l'état entre sommeil et l'éveil. Bien k iso liziés ti fermer et li ti pé reposer, mais so lé cœur li, so l'âme, l'essence même de so être spirituel ti éveiller et li fine trouve saki Allah fine destiner pour li pour trouver et pour vivre, couma dire li pé vive li physiquement (mais ki bien sûr li pas ti vraiment physique – li pas ti avec so lécorps ki fine créer avec la terre).

Insha-Allah, li bien important pour nous tous pou comprend sa sujet là bien, parski l'homme, même ene prophète pas capave défier bane la lois de la nature. Allah fine établi certains règlements, ki tous bane humains, mêmes bane

prophètes bizin respecter. Comme dit Allah, si ti ena anges ki ti marcher lors la terre, abé Li ti pou envoye anges même comme Messagers pou donne So message, mais le fait ki ena dimounes, alors, Li bizin envoye dimounes même comme So messenger. Et en tant ki bane humains, bane prophètes capave oublier, zot dormi, manger, et même faire bane erreurs de temps à autres, couma tous dimounes, mais en vérité zot pas reste bien lontan dans erreur parski Allah, par le biyé de la révélation corrige zot et faire zot plus avancer dans la vie avec *Taqwa* et confiance dans Allah et dans zot capacités comme bane représentants d'Allah lors la terre.

Ki Allah béni nous bien-aimé prophète Hazrat Muhammad (saws) et l'ensemble de so l'*Oummah* en sa siècle là. Nous bizin rappelle bane sacrifices de nous bien-aimé prophète (saws) et nous fer zefforts pou imite li dans nous la vie de tous les jours afin ki nous récolter le plaisir d'Allah. *Insha-Allah, Ameen.*